

Mvù Pôl mé bò Yeésò bò ké Kolôse

Bèh bieê

¹ Né mè Pôl, mbòn̄ tebê Yeésò *Kristò. Càn̄ lé mè mân sie kwaá naâ mé kàgà-ndòn seèn. Bèh òm̄ beèh Timotê nyagá njií né mé

² bí bò nùàr Càn̄ ké Kolôse. Bí bò mbeí beèh mé né gi temé tég yoòr Kristò kwaá njií òóŋ, Tele beèh Càn̄ a, kúlú bí, à haá bí òólê.

Càn̄ vraà

³ Bèh né yeé Càn̄ Tele Fehtoò beèh Yeésò Kristò felè biì dua. Cu òóŋ bèh né bú teèn vra.

⁴ Lòu sam, bèh né njàgà biì ñgweé, ye bí né lom temé yoòr Yeésò Kristò tég kwaá njií, ye bí né lom bò Yeésò bò mé temé cén gwaán ndò.

⁵ Sâ òóŋ, bí ndèm kwaá njií gi né te njií mé Càn̄ lo naâ bí ké te vulúu nyegé kwaá. Njií sâ, bí lé naá giì bú te Njàgà Bagaà ñgweé, bó lé naâ bí se. Ngòr gècèn né cí.

⁶ Lé naâ ké lètenè biì kar waá, né *wón̄ òóŋ kaá ndeé, né mé tàb bèh òóŋ waá yaám ndeé, né bò nùàr gam. Ké lètenè biì né ménâ ndò. Bèh lo mé bí lo ñgweé naâ Njàgà Bagaà, tóg nde wa hèn, née den ka môn̄ yaám ndeé ye. Bí lé naâ mé fùgò beè Càn̄ kuú, bí né gècèn seèn teèn ñené kòó ndò.

⁷ Epaferâs lé feéh naâ bí Njàgà Bagaà sâ kòó. Né mbeí seê beèh, temé beèh òóŋ né gi yoòr

seèn, à seé Kristò boó yeé mé temé cén, à seé ké lètenè bìi boó né mé sòn beèh mene.

⁸ Gèh terreb mé Cúcuí Nḡgâ lé haá naâ bí te bí gwaán bò mbeí bìi mé njéh doô, à lé naá giì béh tueé nyegé.

⁹ Béh yeé ḡgweé aá ménâ, béh yila Càḡ felè bìi duaà, béh sòn dù cú. Béh ye bú a, há lòm bí terreb te bí ḡgweé komo njií mé temé seèn gwaán nê; bú a, há bí kógòn bô lo mé terreb Cúcuí Nḡgâ, te bí ḡene kɔ njèh gècên.

¹⁰ Mɔ baá mân, te bí teèn gɔ yií lom aá faá Fehtoò beèh gwaán nê nɔ, te bí boó komo ye bò njií mé né bú yoòr yilá ndɔ. Sâ te bí wa tàb mé njéh, bí boó seé bagaà, bí né cu Càḡ dé kɔ kɔ ḡeí.

¹¹ Béh né bú dua ye bú a: sòm nji be terrèb seèn ter, à nyén kwá bí terreb yoòr, te bí kwaá sèn, bí yolo komo ye njèh.

¹² Bí kóbó Tele beèh be mé vógó-temé mene. À lé boó naâ kɔ, te bí nde ye ké bèh ḡagâ yilá komo, bí yieé ḡúlú mé à lo nyegé kwaá naâ dé bò nùàr seèn.

¹³ À lé naá giì béh ka cibì turú sòm, à yií njií béh ké lè bògò Huaán yíé-temé seèn.

¹⁴ Mé Nḡuna seèn cên sâ à lé naâ béh te veéne yili sòm, à kulu sòm yúlá-temé beèh lè seèn ndɔ.

**Kristò felè njèh doḡḡ*

¹⁵ Béh Càḡ mé njolo ḡéné bèh, béh bú mé njolo ḡene né yoòr Kristò.

Huaán né bú,

Nùà Dueè felè bò njií mé Càḡ lo si giì naâ doḡḡ

né lom bú ndo.

¹⁶ Lòu sam, Càṅ lo njèh doón si giì naâ mé bú,
ye te den gi dé seèn.

Né mene bò njèh dé ké te vulúu,

né mene bò dé ká doô,

bòó mé njolo né ṅené o, bòó mé njolo ṅéné
ṅgwéh o,

doón Càṅ lo si giì naâ mé bú.

Felè njèh doón né bú ndo.

Sâ terreb wôn né mene naàn, né mene gèh terrèb
dé heè ké te vulúu doón né gi ka seèn.

¹⁷ À lo teèn naá logô koo, te wón nde ye die.

Njii mé né teèn doón lané sie gi né yoòr seèn.

¹⁸ Felè mbàgà Càṅ né bú;

à né feh, mbàgà Càṅ né kukuṅ.

Yòn dé feè duóm né yoòr seèn.

Te cio lé komo yuo logó naâ bú.

Càṅ ye te felè njèh doón den lom bú,

¹⁹ wa lòu sam, kèkèné nyí mé gùm mene né yoòr
seèn;

²⁰ nyí njèh doón ká yoòr nyí nyogó njii giì né
mé bú ma.

Bó faga njii bú ter te toû ndo.

Húóm seèn yeé ber aá, pón die lètenè nùar bô
Càṅ.

À lé mân boó naâ, ye te bó bò njèh dé ké te vulú
mé ká doó doón den cu mé sòn cèn.

²¹ Né mé bí ménâ ndo: léi toò bí bò Càṅ lé naá
giì nòmò dàb we dàb. Mùnò bìi mé seé bìi lé naâ
feh kéh ye, bí né lom bò bònò Càṅ bò ma.

²² Mé njéh mene, kènê Càn bí ká yoòr seèn weh nyogó njií cuù aá kèn. Né mé cio Njuna seèn. À lé naâ faá nùàr nɔ kuú, te yaga sòm bò veên biì dɔ́ɔ́. Càn ye te bí yuo kelà toò nyî ηagásé, te nuaré dèi bí mé ndògò veên dèi yoòr ηéné sáb cú.

²³ Mɔ né mân, sâ kɔ bí den lom nɔ́ɔ́, bí né te ηgòr Cànε tég njebá taré, te bí ndèm yoòr Njàgà Bagaà sòm cú. Bí lé naâ Njàgà Bagaà sâ ηgweé, né *wón dɔ́ɔ́ beè ηgulí sie, bò nùàr dɔ́ɔ́ bú ηgweé gi aá kèn. Mè Pól ndɔ, mè nùà seê hên ηa keéh né felè Njàgà Bagaà sâ.

Seé gwà Càn mé né beè Pól

²⁴ Mè né mé vógó-temé, bò nùàr mò, mè la né mene dà m gèr felè biì ηené laré, mè samé seér né mé njéh dé samê. Ngàn yoòr mò jamé né mân, te gèh gèr mò mboón faá *Kristò lé ye mè nde né felè mbàgà nyî ηéné nɔ. Né kukun seèn.

²⁵ Càn mè seé hên jege haá naâ kɔ́, ye mè a: ηá nùà seê mbàgà nyî, mè nde bí ηgòr nyî mé gùm mene se ma.

²⁶ Càn lɔ ηgòr sâ leér nab kwaá beéh lòù. Nde nde, cu yeé wulu baá, à nde ye bú njolò bò nùàr seèn ηéné sòm keéh,

²⁷ ye te bó ηene kɔ njèh dueè mé nde né nùàr wón dɔ́ɔ́ gam laré. Né njií mé nyî lɔ nyegé leér kwaá naâ lòù. Mè tueé bí, bòó mé Juf sam, njèh dueè sâ né Kristò yoòr biì. Bí mé njéh kwaá gi aá ndèm, ye bí nde né ké mbàm Càn dobo yilá.

²⁸ Béh bò nùàr dɔ́ɔ́ hên tueé den né felè Kristò sâ. Béh né nùà kàn tie ndogó, béh né nùà kân mé

lo mene feh, te bó den mé Kristò yoòr, bó ké toò Càṅ yuo lom faá nùàr nɔ.

²⁹ Terreb mé Yeésò haá né mè hên, mè mé njéh lege den né cí.

2

¹ Bí kóɔ ye, mè né mé seé felè biì kwaré. Seé sâ né felè biì bò Kolôse bò, bò Laodísè bò, mé bò toò bò mene. Bí mene mè kó ṅwéh,

² mè lege lom né ye te temé bí lè kú cú, te bí gwaán kuú lètenè biì, bí ṅa bilí gi dɔ́ɔ́n cén; te lo yam sie bí beè mé gùm mene, bí mé njéh den bò sèsàm bò te ceér Càṅe, temé die bí lè. Teèn sâ, njéh gècèn mé Càṅ lé leér nab kwaá naâ doò, bí nde né ṅweé kóɔ: né gùm *Kristò nùà njéh.

³ Kógòn bô lo mé gùm mene merré den né beè seèn.

⁴ Mè bí mân tueé né ye te nuaré déi bí beè Kristò bèlè nágá sòm cú.

⁵ Mɔ mè la mene ké kwarè biì sam, temé mò dɔ́ɔ́n né gi ké yoòr biì. Mè né ṅweé ye bí né te ceér Kristò tég, bí né temé cén mé bú kwaá njií ndɔ. Mè né lom mé vógó-temé biì lè dé gècèn.

*Dene njêṅ beè Yeésò *Kristò*

⁶ ṅweéh bí lé naá giì gwaán ye Yeésò Kristò né Fehtoò biì mà. Sâ bí ṅò bú.

⁷ Bí dèn lòm beè seèn nɔ́ɔ́n, bí né yoòr seèn teé ndeé, bí temé nɔ́ɔ́n kwaá njií lom mé bú faá bó lé naâ bí feh nɔ; bí né bú teèn vra yií.

⁸ Bí dèn làn, te nuaré déi bí kónkɔn nyeên déi lè bèlè yí cú. Gèh kónkɔn dé sâ né yeé tánágá bò *wón bò. Bò sâ bò né dé bɔ̀n beè tándulù, bó

feh yeé njií mé nùàr munó né kɔ́ó, dèn ngwéh m̀̀nò dé Kristò.

⁹ Dé Kristò, yoòr seèn né gi lélánj kèkèné Càn mé g̀̀m mene.

¹⁰ Sâ tueé né ye, bí b̀̀ó mé né gi yoòr seèn d̀̀óŋ baá gi mé njéh yoòr mé g̀̀m mene nd̀̀. À dé seèn né mé terreɓ felè njèh d̀̀óŋ. Né mene gèh terreɓ dé heè d̀̀óŋ, né gi ka seèn.

¹¹ Bí b̀̀ó mé né gi yoòr Kristò d̀̀óŋ, bí baá gi mé mágá seèn yeyoòr. Né faá bó sé la naâ bí *ngór njób ǹ̀. Njèh cén, bó bú mé be njób ngwéh; Kristò nùà njèh bú yoòr biì maga kwaá né kɔ́ó, ye te bí géé mé ceér veèn.

¹² Nòmò Càn mé bó lé kóú naâ bí doò, bó lé sâ furú bilí naâ bí b̀̀ Kristò. Càn lé sâ te cio komo som bilí naâ bí bó nd̀̀. Lòu sam, bí lé naá giì temé cén yoòr seèn kwaá njií, ye Càn terreɓ lé naâ bú lè cio komo som ma.

¹³ Sâ lo toò, bí lo naá giì b̀̀ komó làn, bí lé ceér Càn kó ná ngwéh, bí lé *sóú seèn cum seér naâ lòu. Mé njéh mene, Càn b̀̀ veèn beèh d̀̀óŋ kulu njií seér doó, à komo som béh mé Kristò.

¹⁴ M̀̀ sam, béh sé kuú seér naâ kɔ́ó. Lòu sam, béh lé naá giì ju beè Càn sela. Mé njéh mene, Càn nde hùà sâ gwom seér mé cio Kristò; den cu né faá à lé naâ hùà sâ ké te toú t̀̀óɔr wulá nd̀̀.

¹⁵ Mé cio cén sâ, à né b̀̀ cècàn te k̀̀gɔ mé njéh huaré som. Njií sâ né mene mé gèh terreɓ dé heè d̀̀óŋ, à né bú toò b̀̀ nùàr huaré; g̀̀g̀ò né die ndeé.

16 Mo né mân, sâ bí té gwàn mé nuaré déi taán haá seér bí njèh lòù, né mene yáb, né mene njèh ñueê, bú a, té bí lòù táñ há. Nuaré déi a, té bí cieé koò déi lòù táñ há ndo; né mene lòù weéh feê joloò, né mene lòù sóù, nuaré déi té bí teèn mbaá nàm kú.

17 Bò njií sâ doónj lé née gi jèrè* ye; kukuñ lé naâ jomo, né Kristò nùà njèh.

18 Bí té gwàn mé bò nùàr taán yíí bí seé boòn déi, wa bí kwàrè mé no, bí dùà gò cìli Càn. Bó né mene ndòn se go, ye né seé Càn, doónj bí té sòn boòn ñgwé, né gi bò hám feh bò, bó sâ punó go né dé wôn.

19 Bò sâ bò dé boòn yoòr Fehtoò beèh sam. Fehtoò beèh dé seèn né feh; kukuñ né bò nùàr seèn. À bó yoòr nyogó bilí né faá yo nyogó bilí yeé bò gà mé cègè no; à né bó koó, bó né faá Càn gwaán nê no kulá huóóm ndo.

*Cio mé yòñ beè Yeésò *Kristò*

20 Bí né koó ye, bí bò Kristò lé naâ koó kuú bilí, ye bò tándulu ká te wónje mé terreè felè bìi sam cuú. Bí yeé ko gi aá ménâ, kei mé boó bí den cu faá bò *wónj bò no wa? Bí tie te bò njií sâ felá njií né dé kei wa? Bó né bí tagá,

21 wa té dé kàn kèrà, té dé kàn nágá, té dé kàn cór ndo. Bí tie teèn felá njií yeé dé kei wa?

22 Mè tueé bí, gèh bò *sóú bú sâ, bó tagá kuú né felè bò njèh wàn. Bò nùàr bò sóú sâ si yeé koó, bó bó feh cu né koó ndo.

2:16 2:16 Rôm 14:1-6 * 2:17 2:17 Waà né feh; dé jomò baá ndeè. 2:19 2:19 Ef. 4:16

²³ Bò sóú hèllè njolò nùàr ñené né faá njèh kógòn nɔ. Dé kàn ye bèh joloò né mân, dé kân ye né mân; wa nùàr a, kwàrè mé nɔ. Bú a, jámé sér yo. Né gi ménâ dág. Njèh cén, nùà kàn a, kóó ye, ndóg bò sóú hèllè veên mé né lè nyí sòm kòmò ndé ngwéh ma.

3

¹ Bí né gi kóó ye, bí bò Kristò lé komo yuo giì naâ te cio kóó. Mɔ né mân, sâ bí fón lòm bò njèh dé ké te vulû, bèh mé Kristò né teèn den den. À né ké te be gaâ Cànɛ.

² Bò njèh dé ké te vulû a, yílá kélá bí yoòr kóó mé bò njèh dé ká lè wónɛ.

³ Lòu sam, bí bò Kristò lé naâ kuú bilí, Cànɛ né bò yòn biì ké beè seèn leér kwaá, à leér kwaá né yoòr Kristò.

⁴ Yòn biì dé jéjêg né Kristò. Mɔ à ndeè cuù baá, te bí ñené lie nyegé kwarè seèn.

Dene dé cuùm mé dé feê

⁵ Mɔ né mân, sâ bí kwóbé leba mé ceér wôn. Mè ye, bí kwóbé leba mé yàgà yòòn, mé fúár ndo. Bí té njèh cì, bí té tuaá ngàn yoòr bèlè, bí té temé te njèh nùàre kwá njí. Mɔ sam, nde né cècàn biì ñaá.

⁶ Bòó mé né ménâ boó doón, né gi feh mé Cànɛ taré. Temé bú lè mé bó ñaá nde né dé cí.

⁷ Mé bí mene, bí lé naá giì veên sâ ngɔ; felè biì lé cer loóm naâ cí.

⁸ Kènê bí sòm á be teèn. Temé a, té bí lè ñá, bí té fúru, bí té temé jéré ndo. Séb a, té bí sònò yùò; bí té biag sònò biì gèh sòm.

⁹ Bí té mé nyeén lètenè biì còrè kú. Lòu sam, yoòr biì yo dé cuùm sam cuú,

¹⁰ baá yo dé feê. Yo dé feê sâ, Càṅ mé lo naâ bú si, né bú beè beè nyeén, te den faá yo seèn nùà ñjèh nɔ, ye mo bí baá faá yo nyí nùà ñjèh, bí nde né nyí mé gùm mene kɔ́ó nyegé.

¹¹ Mo né mân, sâ bòó mé Jûf sam bó bò Jûf né kèi cén; bòó mé *ṅɔb aá ṅgór mé bòó mé ṅgór ṅɔb ṅgwéh dɔ́ṅ né gi kèi cén ndo. Né mene bò ya dueè bò, né mene bò cùr, né mene bò kwer, né mene bòó mé kwer sam dɔ́ṅ né gi beè Càṅ kèi cén. Càṅ dé seèn kɔ lom né Kristò mé né lè bɔ́on.

¹² Càṅ lé balé weéh naâ bí kɔ́ó, bí né bò dé seèn, temé seèn né gi yoòr biì. Mo né mân, bí dèn mé jere bò mbaábii lè, bí dèn bò húóm-temé bò, bí té ṅgúmó, bí dèn sér dɔ́lésé, bí né temé sie,

¹³ bí né lètenè biì yoló kuú. Temé né mene nuaré déi mé mbeí yulá, bú a, kúlú sòm lè seèn kulù. Bí kúlú sòm gí veèn bò mbaábii lè biì, faá Nùà Dueè né bò dé biì lè seèn kulú sòm nɔ.

¹⁴ Njii mé kela né kɔ́ó né gwaân. Bú a, ká sè lòm bí beè mé gùm mene, te bí dɔ́ṅ nyɔ́gó bilí gi cén.

¹⁵ Bí kwá Kristò lab bí mboó. À bí yilá kuú né mé ñjéh, ye te bí dɔ́ṅ ña bilí cén. Sâ bí vrà bílí

bú.

¹⁶ Bí kwá ngòr Kristò si ngùlù lètenè biì, bí né lètenè biì feh kuú, bí né sɔgò kuú mé kógòn mene ndɔ. Bí sɪ bené, bí né ngòr Càṅ lòu de. Bò bené mé Cúcuí Nɔgâ né bele teèn dɔɔṅ, bí sɛn gí Càṅ mé njéh seèn, bí sɛn lòm bú mé temé biì mene, bí né bú vra ndɔ.

¹⁷ Bí né mene njeré déi bɔɔ, bí tueé mene lòu, bí dɔɔṅ bó gí mé yilí Fehtoò beèh Yeésò. Bí né Tele beèh Càṅ beè seèn vra keéh ndɔ.

Dene nùà Yeésò toò bò mbeì

¹⁸ Bí bò véh, bí ngwé sòn bò si biì ngweè, seé biì toò Fehtoò beèh né cí.

¹⁹ Bí bò siìb, bí dèn mé gwaân bò véh biì lè ndɔ, bí té bó lòu fúru sér.

²⁰ Bí bò huaân, bí ngwé làrè sòn bò tele biì mé meí biì te njèh dɔɔṅe. Mɔ bí né ménâ bɔɔ, nde né Càṅ yoòr huɔóm.

²¹ Bí bò tele huaân, bí té bò huaân lòu ndè jéla sér; temé nde né bó lè gur.

²² Bí bò kwer, bí ngwé sòn bò tele seé biì ngweè, bí témá làrè seé bɔɔn mé temé cén, bí té lélaṅ njòlò nùàr bó húóm lòm, ye te bó keí bí. Bí dé biì dula né Fehtoò beèh.

²³ Seé sâ den mene naàn, bí bó lòm bú mé temé cén faá seé Fehtoò beèh nɔ, bí té túé ye né lom seé dé bò nùàr.

²⁴ Bí kɔɔ ye, Fehtoò beèh gwɔm nde né bí kɔɔ. Gà ngùlù mé à lé naâ mé bò nùàr seèn nyegé

3:16 3:16-17 Ef. 5:19-20 **3:18 3:18** Ef. 5:22; 1 Pi. 3:1 **3:19**
3:19 Ef. 5:25; 1 Pi. 3:7 **3:20 3:20** Ef. 6:1 **3:21 3:21** Ef. 6:4
3:22 3:22-25 Ef. 6:5-8

kwaá, bí nde né yieé ndo. Lòu sam, seé bìi né seé Fehtoò beèh Křistò.

²⁵ Nuaá mé né seé vevenê boó doón, Fehtoò beèh nde cu né bú mé sàgà dé veên ménâ gwom ndo; à seèn nùàr lòu gèi bèh.

4

¹ Bí bò tele seê, bí bó dìli nyégé felè bò kwer bìi bagasé. Bí kóo ye, bí né taré ka Nùà koò bìi ké te vulúu ménâ ndo.

Ndéb ceré jomò

² Bí dùà dèn Càn cu doón, bí né làn den, bí né bú teèn vra keéh,

³ bí né bú felè beèh dua ndo, te béh kwa ceér, béh se ngòr seèn, te ju *Křistò mé lé naà lòu leér den, ñené yuo kelà bèsonè. Mè ká gwà cibì tétég hên yila kuú né mé njéh.

⁴ Sâ bí dùà Càn teèn, te mè se bò nùàr faá né tueé no.

⁵ Bòó mé bò Yeésò bò sam, bí dèn toò boòn ngulísé. Lón mé né toò bìi ñené doón, bí té yì kéh.

⁶ Bò ngòr bìi a, ngúlí sábé lòm bò nùàr tieè cu doón lòu. Njií mé bó né bí bieé nyégé doón, bí kó gèh dé mé bí nde né bó bagasé se nyégé.

Bèh ceré

⁷ Tisík òm yíé-temé beèh tueé nde né bí njàgà mò kóó. À né lom seé Fehtoò beèh mé temé cén boó, béh bú seé boó yeé kóó.

⁸ Mè bú ké yoòr bìi tétég hên tema njií kuú né, ye te bí ñgweé kùr beèh, temé taré cu bí lè.

⁹ Bô Onesîm òm yíé-temé beèh dèi go ñde né kɔ́. Onesîm dé seèn né nùàr bìi cén dèi, à seé Càṅ bɔ́ né mé temé cén. Njií mé né kán kelá dɔ́ṅ, bó ñde né bí tueé.

¹⁰ Aristârk ye bíé kék bí. Béh bú né ká gwà cibì kɔ́. Mârk ṅunà bei Bàrnâbâs ye bíé kék bí ndɔ. Mè lé naá gií bí tueé ye bí a, mo à waà baá, bí siè nyégé bú bagasé ma.

¹¹ Yeésò mé bó yílá cu né Jústùs, ye bíé kék bí ndɔ. Lètenè bô Juf mé né bô Yeésò bô dɔ́ṅ, seé *Lò Càṅ ká lo bɔ́ lom né béh bô tagár bô hên. Yo mò né lom mé bó taré dé gècên.

¹² Nùà bìi Epaferâs ye bíé kék bí. Né nùà seé Yeésò Kristò ndɔ. À né Càṅ felè bìi dua, à sòn dù ñgwéh, ye Càṅ a, há bí terreb, te bí den lom tég, bí né teèn joló huóóm; te njií mé Càṅ gwaán nê, bí njií sâ ṅene ko lom mé gùm mene, bí bɔ́ cí.

¹³ Dé hên, mè ñde né sòn seèn gwaán: à né lom bí mé gècên mene munó. À né bô nùàr Laodísè munó, à né bô Hierapolí bô ménâ munó ndɔ.

¹⁴ Lûk dóptà yíé-temé beèh bô Demâs ye bíé kék bí ndɔ ma.

¹⁵ Bí bíé kék bô mbeí beèh ké Laodísè dɔ́ṅ, bí bie keéh Nimfà mé bô Yeésò bô mé bilí yeé ké gwò seèn mene.

¹⁶ Mo bó jaṅé gi aá mvù hên lètenè bìi, bí há njií mé bô Laodísè bô te bó jaṅé ké te mògò bòn

4:9 4:9 Filem. 10-12 **4:10 4:10** Seé b. 19:29; 27:2; Filem. 24; Seé b. 12:12, 25; 13:13; 15:37-39 **4:12 4:12** Kol. 1:7; Filem. 23
4:14 4:14 2 Tim. 4:10, 11; Filem. 24

ndo. Mo bô Laodísè bô tema njií aá bí mvù mò déi, bí jáṅé cú lè m̀̀gò bìi ménâ ndo.

¹⁷ Bí júée Arsîp a, seé Fehtoò beèh mé né beè seèn doô, bú a, bó sòm bôò ma.

¹⁸ Né mè Pôl, mè bèh hên nyagá né mé be mò, mè bie aá bí. Bí té nyèn, ye mè né dé mò ká gwà cibì ndo. Húóm-temé Càṅ a, ká sè gí bí beè.

Mvù Ngòŋ Feê
Mambilla NT (Cameroon-Le Nouveau Testament en
mambila)

copyright © 2001 Wycliffe Bible Translators, Inc.

Language: Cameroon Mambila

Contributor: Wycliffe Bible Translators, Inc.

All rights reserved.

2025-05-13

PDF generated using Haiola and XeLaTeX on 13 May 2025 from source
files dated 13 May 2025
f0e8e7ba-c2cf-57f7-9a60-8ff0e792e158